

《瑜伽 94》

《雜阿含經卷第十四》

宋天竺三藏求那跋陀羅譯

(三四三) # 觸緣

[0093b25] 如是我聞：

[0093b25] 一時，佛住王舍城迦蘭陀竹園。爾時，尊者浮彌比丘住耆闍崛山。

[0093b26] 時，有眾多外道出家詣尊者浮彌所，共相問訊慶慰，共相問訊慶慰已，退坐一面，語尊者浮彌言：「欲有所問，寧有閑暇見答與不？」

[0093c01] 尊者浮彌語諸外道出家：「隨汝所問，當為汝說。」

[0093c02] 時，諸外道出家問尊者浮彌：「苦樂自作耶？」

[0093c03] 尊者浮彌答言：「諸外道出家說苦樂自作者，世尊說言：『此是無記。』」

[0093c04] 復問：「苦樂他作耶？」

[0093c05] 答言：「苦樂他作者，世尊說言：『此是無記。』」

[0093c06] 復問：「苦樂自他作耶？」

[0093c06] 答言：「苦樂自他作者，世尊說言：『此是無記。』」

[0093c07] 復問：「苦樂非自非他無因作耶？」

[0093c08] 答言：「苦樂非自非他無因作者，世尊說言：『此是無記。』」

[0093c09] 諸外道出家復問：「云何？尊者浮彌苦樂自作耶？說言無記。苦樂他作耶？說言無記。苦樂自他作耶？說言無記。苦樂非自非他無因作耶？說言無記。今沙門瞿曇說苦樂云何生？」

[0093c13] 尊者浮彌答言：「諸外道出家！世尊說苦樂從緣起生。」

[0093c14] 時，諸外道出家聞尊者浮彌所說，心不歡喜，呵責而去。

[0093c15] 爾時，尊者舍利弗去尊者浮彌不遠，坐一樹下。

[0093c17] 爾時，尊者浮彌知諸外道出家去已，往詣尊者舍利弗所，到已，與舍利弗面相慶慰。慶慰已，以彼諸外道出家所問事，具白尊者舍利弗：「我作此答，得不謗毀世尊！如說說、不如法說、不為是隨順法行法，得無為餘因法論者來難詰呵責不？」

[0093c22] 尊者舍利弗言：「尊者浮彌！汝之所說，實如佛說，不謗如來，如說說、如法說、法行法說，不為餘因論義者來難詰呵責。所以者何？

世尊說苦樂從緣起生故。尊者浮彌！彼諸沙門、婆羅門所問苦樂自作者，彼亦從因起生；言不從緣起生者，無有是處。

苦樂他作、自他作、非自非他無因作說者，彼亦從緣起生；若言不從緣生者，無有是處。

尊者浮彌！彼沙門、婆羅門所說苦樂自作者，亦緣觸生；

若言不從觸生者，無有是處。苦樂他作、自他作、非自非他無因作者，彼亦緣觸生，若言不緣觸生者，無有是處。」

[0094a05] 爾時，尊者阿難去舍利弗不遠，坐一樹下，聞尊者舍利弗與尊者浮彌所論說事。聞已，從座起，往詣佛所，稽首佛足，退住一面。以尊者浮彌與尊者舍利弗共論說一一具白世尊。

[0094a09] 佛告阿難：「善哉！善哉！阿難！尊者舍利弗有來問者，能隨時答。善哉！舍利弗！有應時智故，有來問者，能隨時答。若我聲聞，有隨時問者，應隨時答，如舍利弗所說。」

[0094a13] 「阿難！我昔時住王舍城山中仙人住處，有諸外道出家以如是義、如是句、如是味來問於我，我為斯等以如是義、如是句、如是味而為記說，如尊者舍利弗所說。」

[0094a17] 「阿難！若諸沙門、婆羅門苦樂自作，我即往彼問言：『汝實作是說苦樂自作耶？』彼答我言：『如是。』我即問言：『汝能堅執持此義，言是真實，餘則愚者，我所不許。所以者何？我說苦樂所起異於此。』

彼若問我：『云何瞿曇所說，苦樂所起異者？』我當答言：『從其緣起而生苦樂。如是說苦他作、自他作、非自非他無因作者，我亦往彼所說如上。』」

[0094a24] 阿難白佛：「如世尊所說義，我已解知，有生故有老死，非緣餘；有生故有老死，乃至無明故有行，非緣餘；有無明故有行，無明滅則行滅，乃至生滅則老、病、死、憂、悲、惱、苦滅，如是純大苦聚滅。」

[0094a29] 佛說此經已，尊者阿難聞佛所說，歡喜隨喜，作禮而去。

（三四四）# 見圓滿

[0094b02] 如是我聞：

[0094b02] 一時，佛住王舍城迦蘭陀竹園。爾時，尊者舍利弗、尊者摩訶拘絺羅住耆闍崛山。

[0094b04] 時，尊者摩訶拘絺羅晡時從禪定起，詣舍利弗所，共相慶慰，共相慶慰已，退坐一面，語尊者舍利弗：「欲有所問，寧有閑暇見答與不？」

[0094b07] 尊者舍利弗語尊者摩訶拘絺羅：「仁者但問，知者當答。」

[0094b08] 尊者摩訶拘絺羅語尊者舍利弗言：「多聞聖弟子於此法、律，成就何法，名為見具足，直見成就，成就於佛不壞淨，來入正法，得此正法，悟此正法。」

[0094b12] 尊者舍利弗語尊者摩訶拘絺羅：「多聞聖弟子於不善法如實知、不善根如實知、善法如實知、善根如實知。

[0094b14] 「云何不善法如實知？不善身業、口業、意業，是名不善法。如是不善法如實知。云何不善根如實知？三不善根，貪不善根、恚不善根、癡不善根，是名不善根。如是不善根如實知。

[0094b18] 「云何善法如實知？善身業、口業、意業，是名善法。如是善法如實知。云何善根如實知？謂三善根，無貪、無恚、無癡，是名三善根。如是善根如實知。

[0094b22] 「尊者摩訶拘絺羅！如是多聞聖弟子不善法如實知、不善根如實知、善法如實知、善根如實知，故於此法、律正見具足，直見成就，於佛不壞淨成就，來入正法，得此正法，悟此正法。」

[0094b26] 尊者摩訶拘絺羅語尊者舍利弗：「正有此等，更有餘耶？」

[0094b27] 尊者舍利弗言：「有。若多聞聖弟子於食如實知，食集、食滅、食滅道跡如實知。

[0094b29] 「云何於食如實知？謂四食。何等為四？一者麤搏食，二者細觸食，三者意思食，四者識食，是名為食。如是食如實知。

云何食集如實知？謂當來有愛，喜、貪俱，彼彼樂著，是名食集，如是食集如實知。

云何食滅如實知？若當來有愛，喜、貪俱，彼彼樂著無餘斷、捨、吐、盡、離欲、滅、息、沒，是名食滅，如是食滅如實知。

云何食滅道跡如實知？謂八聖道，正見、正志、正語、正業、正命、正方便、正念、正定，是名食滅道跡。如是食滅道跡如實知。

[0094c10] 「若多聞聖弟子於此食如實知、食集如實知、食滅如實知、食滅道跡如實知。是故多聞聖弟子於正法、律正見具足，直見成就，於佛不壞淨成就，來入正法，得此正法，悟此正法。」

[0094c14] 尊者摩訶拘絺羅復問尊者舍利弗：「正有此等，更有餘耶？」

[0094c15] 尊者舍利弗言：「尊者摩訶拘絺羅！復更有餘，多聞聖弟子於病如實知、病集如實知、病滅如實知、病滅道跡如實知。

[0094c18] 「云何有病如實知？謂三病，欲病、有病、無明病，是名病。如是病如實知。云何病集如實知？無明集是病集，是名病集如實知。云何病滅如實知？無明滅是病滅，如是病滅如實知。云何病滅道跡如實知？謂八正道，如前說。如是病滅道跡如實知。

[0094c24] 「若多聞聖弟子於病如實知、病集如實知、病滅如實知、病滅道跡如實知，故多聞聖弟子於此法、律正見具足，乃至悟此正法。」

[0094c27] 尊者摩訶拘絺羅問尊者舍利弗：「正有此等，更有餘耶？」

[0094c28] 尊者舍利弗語尊者摩訶拘絺羅：「亦更有餘，多聞聖弟子於苦如實知、苦集如實知、苦滅如實知、苦滅道跡如實知。

[0095a01] 「云何苦如實知？謂生苦、老苦、病苦、死苦、恩愛別苦、怨憎會苦、所欲不得苦。如是略說五受陰苦，是名為苦，如是苦如實知。

云何苦集如實知？當來有愛，喜、貪俱，彼彼集著，是名苦集，如是苦集如實知。

云何苦滅如實知？若當來有愛，喜、貪俱，彼彼染著無餘斷，乃至息、沒，是名苦滅，如是苦滅如實知。

云何苦滅道跡如實知？謂八聖道……」如上說，「是名苦滅道跡，如是苦滅道跡如實知。

[0095a10] 「多聞聖弟子如是苦如實知，苦集、苦滅、苦滅道跡如實知。如是聖弟子於我法、律具足正見，直見成就，於佛不壞淨成就，來入正道，得此正法，悟此正法。」

[0095a14] 復問尊者舍利弗：「正有此法，復有餘耶？」

[0095a15] 尊者舍利弗答言：「更有餘，謂多聞聖弟子老死如實知、老死集如實知、老死滅如實知、老死滅道跡如實知，如前分別經說。

云何老死集如實知，生集是老死集，生滅是老死滅，老死滅道跡，謂八正道。如前說。多聞聖弟子於此老死如實知，乃至老死滅道跡如實知。如是聖弟子於我法、律正見具足，直見成就，於佛不壞淨成就，來入正法，得此正法，悟此正法。如是生、有、取、愛、受、觸、六入處、名色、識、行，聖弟子於行如實知，行集、行滅、行滅道跡如實知。

[0095a25] 「云何行如實知？行有三種，身行、口行、意行，如是行如實知。

云何行集如實知？無明集是行集，如是行集如實知。

云何行滅如實知？無明滅是行滅，如是行滅如實知。

云何行滅道跡如實知？謂八聖道，如前說。

摩訶拘絺羅！是名聖弟子行如實知，行集、行滅、行滅道跡如實知，於我法、律正見具足，直見成就，於佛不壞淨成就，來入正法，得此正法，悟此正法。」

[0095b05] 摩訶拘絺羅復問尊者舍利弗：「唯有此法，更有餘耶？」

[0095b06] 舍利弗答言：「摩訶拘絺羅！汝何為逐，汝終不能究竟諸論，得其邊際，若聖弟子斷除無明而生明，何須更求？」

[0095b09] 時，二正士共論義已，各還本處。

（三四五）# 實

[0095b10] 如是我聞：

[0095b10] 一時，佛住王舍城迦蘭陀竹園。

[0095b11] 爾時，世尊告尊者舍利弗：「如我所說，波羅延那阿逸多所問：

「『若得諸法教， 若復種種學，
具威儀及行， 為我分別說。』

[0095b15] 「舍利弗！何等為學？何等為法數？」

[0095b15] 時，尊者舍利弗默然不答，第二、第三亦復默然。

[0095b16] 佛言：「真實。舍利弗！」

[0095b17] 舍利弗白佛言：「真實。世尊！世尊！比丘真實者，厭、離欲、滅盡向。食集生，彼比丘以食故，生厭、離欲、滅盡向。彼食滅，是真實滅，覺知已，彼比丘厭、離欲、滅盡向，是名為學。」

[0095b21] 「復次，真實，舍利弗！」

[0095b21] 舍利弗白佛言：「真實。世尊！世尊！若比丘真實者，厭、離欲、滅盡，不起諸漏，心善解脫。彼從食集生，若真實即是滅盡，覺知此已，比丘於滅生厭、離欲、滅盡，不起諸漏，心善解脫，是數法。」

[0095b25] 佛告舍利弗：「如是，如是，如汝所說。比丘於真實生厭、離欲、滅盡，是名法數。」如是說已，世尊即起，入室坐禪。

[0095b28] 爾時，尊者舍利弗知世尊去已，不久，語諸比丘：「諸尊！我不能辯

世尊初問，是故我默念住。世尊須臾復為作發喜問，我即開解如此之義，正使世尊一日一夜，乃至七夜，異句、異味問斯義者，我亦悉能，乃至七夜，以異句、異味而解說之。」

[0095c04] 時，有異比丘往詣佛所，稽首禮足，退住一面，白佛言：「世尊！尊者舍利弗作奇特未曾有說，於大眾中，一向師子吼言：『我於世尊初問，都不能辯，乃至三問默然無答。世尊尋復作發喜問，我即開解，正使世尊一日一夜，乃至七夜，異句異味問斯義者，我亦悉能，乃至七夜，異句異味而解說之。』」

[0095c11] 佛告比丘：「彼舍利弗比丘實能於我一日一夜，乃至異句異味，七夜所問義中悉能，乃至七夜，異句異味而解說之。所以者何？舍利弗比丘善入法界故。」

[0095c15] 佛說此經已，彼比丘聞佛所說，歡喜奉行。

（三四六）# 不愛樂

[0095c17] 如是我聞：

[0095c17] 一時，佛住王舍城迦蘭陀竹園。

[0095c18] 爾時，世尊告諸比丘：「有三法，世間所不愛、不念、不可意。何等為三？謂老、病、死。世間若無此三法不可愛、不可念、不可意者，如來、應、等正覺不出於世間，世間亦不知有如來、應、等正覺知見，說正法、律。以世間有老、病、死三法不可愛、不可念、不可意故，是故如來、應、等正覺出於世間，世間知有如來、應、等正覺所知、所見，說正法、律。

[0095c25] 「以三法不斷故，不堪能離老、病、死。何等為三？謂貪、恚、癡，復有三法不斷故，不堪能離貪、恚、癡。何等為三？謂身見、戒取、疑。復有三法不斷故，不堪能離身見、戒取、疑。何等為三？謂不正思惟、習近邪道，及懈怠心。

復有三法不斷故，不堪能離不正思惟、習近邪道及懈怠心。何等為三？謂失念、不正知、亂心。

復有三法不斷故，不堪能離失念、不正知、亂心。何等為三？謂掉、不律儀、不學戒。

復有三法不斷故，不堪能離掉、不律儀、不學戒。何等為三？謂不信、難教、懈怠。

復有三法不斷故，不堪能離不信、難教、懈怠。何等為三？謂不欲見聖、不欲聞法、常求人短。

復有三法不斷故，不堪能離不欲見聖、不欲聞法、常求人短。何等為三？謂不恭敬、戾語、習惡知識。

復有三法不斷故，不堪能離不恭敬、戾語、習惡知識。何等為三？謂無慚、無愧、放逸，此三法不斷故，不堪能離不恭敬、戾語、習惡知識。

[0096a14] 「所以者何？

以無慚、無愧故放逸，放逸故不恭敬，不恭敬故習惡知識，習惡知識故不欲見聖、不欲聞法、常求人短，求人短故不信、難教、戾語、癡墮，癡墮故掉、不律儀、不學戒。不學戒故失念、不正知、亂心。亂心故不正思惟、習近邪道、懈怠心。懈怠心故身見、戒取、疑。疑故不離貪、恚、癡。不離貪、恚、癡故不堪能離老、病、死。

[0096a22] 「斷三法故，堪能離老、病、死。云何三？謂貪、恚、癡，此三法斷已，堪能離老、病、死，復三法斷故，堪能離貪、恚、癡。云何三？謂身見、戒取、疑，此三法斷故，堪能離貪、恚、癡。

復三法斷故，堪能離身見、戒取、疑。云何為三？謂不正思惟、習近邪道、起懈怠心，此三法斷故，堪能離身見、戒取、疑。

復三法斷故，堪能離不正思惟、習近邪道及懈怠心。云何為三？謂失念心、不正知、亂心，此三法斷故，堪能離不正思惟、習近邪道及心懈怠。

復三法斷故，堪能離失念心、不正知、亂心。何等為三？謂掉、不律儀、犯戒，此三法斷故，堪能離失念心、不正知、亂心，復有三法斷故，堪能離掉、不律儀、犯戒。云何三？謂不信、難教、癡墮，此三法斷故，堪能離掉、不律儀、犯戒。

復有三法斷故，堪能離不信、難教、癡墮。云何為三？謂不欲見聖、不樂聞法、好求人短，此三法斷故，堪能離不信、難教、癡墮。

復三法斷故，堪能離不欲見聖、不欲聞法、好求人短。云何為三？謂不恭敬、戾語、習惡知識，此三法斷故，離不欲見聖、不欲聞法、好求人短。

復有三法斷故，堪能離不恭敬、戾語、習惡知識。云何三？謂無慚、無愧、放逸。

[0096b15] 「所以者何？

以慚愧故不放逸，不放逸故恭敬順語、為善知識，為善知識故樂見賢聖、樂聞正法、不求人短，不求人短故生信、順語、精進，精進故不掉、住律儀、學戒。學戒故不失念、正知、住不亂心。不亂心故正思惟、習近正道、心不懈怠。心不懈怠故不著身見、不著戒取、度疑惑。不疑故不起貪、恚、癡，離貪、恚、癡故堪能斷老、病、死。」

[0096b23] 佛說此經已，諸比丘聞佛所說，歡喜奉行。

(三四七) # 法住智

[0096b25] 如是我聞：

[0096b25] 一時，佛住王舍城迦蘭陀竹園。若王、大臣、婆羅門、長者、居士

及餘世人所共恭敬、尊重、供養，佛及諸聲聞眾大得利養，衣被、飲食、臥具、湯藥；都不恭敬、尊重、供養眾邪異道衣被、飲食、臥具、湯藥。

[0096b29] 爾時，眾多異道聚會未曾講堂，作如是論：「我等昔來常為國王、大臣、長者、居士及餘一切之所奉事，恭敬供養衣被、飲食、臥具、湯藥，今悉斷絕，但恭敬供養沙門瞿曇、聲聞大眾衣被、飲食、臥具、湯藥。今此眾中，誰有智慧、大力，堪能密往詣彼沙門瞿曇眾中出家，聞彼法已，來還廣說，我等當復用彼聞法化諸國王、大臣、長者、居士，令其信樂，可得還復供養如前？」

[0096c09] 時，有人言：「有一年少，名曰須深，聰明點慧，堪能密往沙門瞿曇眾中出家，聽彼法已，來還宣說。」

[0096c11] 時，諸外道詣須深所，而作是言：「我今日大眾聚集未曾講堂，作如是論：『我等先來為諸國王、大臣、長者、居士及諸世人之所恭敬奉事，供養衣被、飲食、臥具、湯藥，今悉斷絕，國王、大臣、長者、居士及諸世間悉共奉事沙門瞿曇、聲聞大眾。我此眾中，誰有聰明點慧，堪能密往沙門瞿曇眾中出家學道，聞彼法已，來還宣說，化諸國王、大臣、長者、居士、令我此眾還得恭敬、尊重、供養？』其中有言：『唯有須深聰明點慧，堪能密往瞿曇法中出家學道，聞彼說法，悉能受持，來還宣說。』是故我等故來相請，仁者當行。」

[0096c23] 時，彼須深默然受請，詣王舍城迦蘭陀竹園。

[0096c24] 時，眾多比丘出房舍外露地經行。爾時，須深詣眾多比丘，而作是言：「諸尊！我今可得於正法中出家受具足，修梵行不？」

[0096c27] 時，眾多比丘將彼須深詣世尊所，稽首禮足，退住一面，白佛言：「世尊！今此外道須深欲求於正法中出家受具足，修梵行。」

[0097a01] 爾時，世尊知外道須深心之所念，告諸比丘：「汝等當度彼外道須深，令得出家。」時，諸比丘願度須深。

[0097a03] 出家已經半月，有一比丘語須深言：「須深當知，我等生死已盡，梵行已立，所作已作，自知不受後有。」

[0097a05] 時，彼須深語比丘言：「尊者！云何？學離欲、惡不善法，有覺有觀，離生喜樂，具足初禪，不起諸漏，心善解脫耶？」

[0097a08] 比丘答言：「不也，須深！」

[0097a08] 復問：「云何？離有覺有觀，內淨一心，無覺無觀，定生喜樂，具足第二禪，不起諸漏，心善解脫耶？」

[0097a11] 比丘答言：「不也，須深！」

[0097a11] 復問：「云何？尊者離喜，捨心住正念正智，身心受樂，聖說及捨，具足第三禪，不起諸漏，心善解脫耶？」

[0097a13] 答言：「不也，須深！」

[0097a14] 復問：「云何？尊者離苦息樂，憂喜先斷，不苦不樂捨，淨念一心，具足第四禪，不起諸漏，心善解脫耶？」

[0097a16] 答言：「不也，須深！」

[0097a16] 復問：「若復寂靜解脫起色、無色，身作證具足住，不起諸漏，心善解脫耶？」

[0097a18] 答言：「不也，須深！」

[0097a19] 須深復問：「云何？尊者所說不同，前後相違。云何不得禪定而復記說？」

[0097a20] 比丘答言：「我是慧解脫也。」

[0097a21] 作是說已，眾多比丘各從座起而去。

[0097a22] 爾時，須深知眾多比丘去已，作是思惟：「此諸尊者所說不同，前後相違，言不得正受，而復記說自知作證。」

作是思惟已，往詣佛所，稽首禮足，退住一面，白佛言：「世尊！彼眾多比丘於我面前記說：『我生已盡，梵行已立，所作已作，自知不受後有。』我即問彼尊者：『得離欲、惡不善法，乃至身作證，不起諸漏，心善解脫耶？』彼答我言：『不也，須深！』我即問言：『所說不同，前後相違，言不入正受，而復記說，自知作證。』彼答我言：『得慧解脫。』作此說已，各從座起而去。我今問世尊：『云何彼所說不同，前後相違，不得正受，而復說言：「自知作證。」？』」

[0097b05] 佛告須深：「彼先知法住，後知涅槃。彼諸善男子獨一靜處，專精思惟，不放逸法，離於我見，不起諸漏，心善解脫。」

[0097b08] 須深白佛：「我今不知先知法住，後知涅槃。彼諸善男子獨一靜處，專精思惟，不放逸法，離於我見，不起諸漏，心善解脫。」

[0097b11] 佛告須深：「不問汝知不知，且自先知法住，後知涅槃。彼諸善男子獨一靜處，專精思惟，不放逸住，離於我見，心善解脫。」

[0097b14] 須深白佛：「唯願世尊為我說法，令我得知法住智，得見法住智。」

[0097b15] 佛告須深：「我今問汝，隨意答我。須深！於意云何？有生故有老死，不離生有老死耶？」

[0097b17] 須深答曰：「如是，世尊！」

[0097b18] 「有生故有老死，不離生有老死。如是生、有、取、愛、受、觸、六入處、名色、識、行、無明，有無明故有行，不離無明而有行耶？」

[0097b21] 須深白佛：「如是，世尊！有無明故有行，不離無明而有行。」

[0097b22] 佛告須深：「無生故無老死，不離生滅而老死滅耶？」

[0097b23] 須深白佛言：「如是，世尊！無生故無老死，不離生滅而老死滅。」

[0097b25] 「如是，乃至無無明故無行，不離無明滅而行滅耶？」

[0097b26] 須深白佛：「如是，世尊！無無明故無行，不離無明滅而行滅。」

[0097b28] 佛告須深：「作如是知、如是見者，為有離欲、惡不善法，乃至身作證具足住不？」

[0097b29] 須深白佛：「不也，世尊！」

[0097c01] 佛告須深：「是名先知法住，後知涅槃。彼諸善男子獨一靜處，專精思惟，不放逸住，離於我見，不起諸漏，心善解脫。」

[0097c04] 佛說此經已，尊者須深遠塵離垢，得法眼淨。

[0097c05] 爾時，須深見法得法，覺法度疑，不由他信，不由他度，於正法中心得無畏，稽首佛足，白佛言：「世尊！我今悔過，我於正法中盜密出家，是故悔過。」

[0097c08] 佛告須深：「云何於正法中盜密出家？」

[0097c09] 須深白佛言：「世尊！有眾多外道來詣我所，語我言：『須深當知，我等先為國王、大臣、長者、居士及餘世人恭敬供養，而今斷絕，悉共供養沙門瞿曇、聲聞大眾。汝今密往沙門瞿曇、聲聞眾中出家受法，得彼法已，還來宣說我等，當以彼聞法教化世間，令彼恭敬供養如初。』是故，世尊！我於正法、律中盜密出家，今日悔過，唯願世尊聽我悔過，以哀愍故。」

[0097c17] 佛告須深：「受汝悔過，汝當具說：『我昔愚癡、不善、無智，於正法、律盜密出家，今日悔過，自見罪、自知罪，於當來世律儀成就，功德增長，終不退減。』所以者何？凡人有罪，自見、自知而悔過者，於當來世律儀成就，功德增長，終不退減。」

[0097c23] 佛告須深：「今當說譬，其智慧者，以譬得解。譬如國王有防邏者，捉捕盜賊，縛送王所，白言：『大王！此人劫盜，願王處罪。』王言：『將罪人去，反縛兩手，惡聲宣令，周遍國中，然後將出城外刑罪人處，遍身四體，劓

以百矛。』彼典刑者受王教令，送彼罪人，反縛兩手，惡聲宣唱，周遍城邑，將出城外刑罪人處，遍身四體，劓以百矛。日中，王問：『罪人活耶？』臣白言：『活。』王復勅臣：『復劓百矛。』至日晡時，復劓百矛，彼猶不死。」

[0098a03] 佛告須深：「彼王治罪，劓以三百矛，彼罪人身寧有完處如手掌不？」

[0098a05] 須深白佛：「無也，世尊！」

[0098a05] 復問須深：「時彼罪人，劓以三百矛因緣，受苦極苦劇不？」

[0098a07] 須深白佛：「極苦。世尊！若劓以一矛，苦痛難堪，況三百矛，當可堪忍？」

[0098a08] 佛告須深：「此尚可耳，若於正法、律盜密出家，盜受持法，為人宣說，當受苦痛倍過於彼。」

[0098a10] 佛說是法時，外道須深漏盡意解，佛說此經已，尊者須深聞佛所說，歡喜奉行。

（三四八）#精進

[0098a13] 如是我聞：

[0098a13] 一時，佛住王舍城迦蘭陀竹園。

[0098a14] 爾時，世尊告諸比丘：「如來成就十種力，得四無畏，知先佛住處，能轉梵輪，於大眾中震師子吼言：『此有故彼有，此起故彼起，謂緣無明行……』」廣說乃至「『純大苦聚集，純大苦聚滅。』

諸比丘！此是真實教法顯現，斷生死流，乃至其人悉善顯現。

如是真實教法顯現，斷生死流，足令善男子正信、出家，方便修習，不放逸住，於正法、律精勤苦行，皮筋骨立，血肉枯竭；若其未得所當得者，不捨慙懃精進，方便堅固堪能。所以者何？

懈怠苦住，能生種種惡不善法。當來有結熾然增長，於未來世生、老、病、死，退其大義故。

精進樂獨住者，不生種種惡不善法。當來有結熾然苦報，不於未來世增長生、老、病、死，大義滿足，得成第一教法之場。所謂大師面前，親承說法，寂滅涅槃，菩提正向，善逝、正覺。

是故，比丘！當觀自利、利他、自他俱利，精勤修學，我今出家，不愚不惑，有果有樂，諸所供養衣服、飲食、臥具、湯藥者，悉得大果、大福、大利，當如是學。」

[0098b04] 佛說是經已，諸比丘聞佛所說，歡喜奉行。

(三四九) # 能生聖處

[0098b06] 如是我聞：

[0098b06] 一時，佛住王舍城迦蘭陀竹園。

[0098b07] 爾時，世尊告諸比丘：「善來比丘！善出家、善得己利，曠世時時得生聖處；諸根具足，不愚不癡，不須手語，好說、惡說堪能解義。我今於此世作佛——如來、應、等正覺、明行足、善逝、世間解、無上士、調御丈夫、天人師、佛世尊，說法寂滅、涅槃、菩提正向、善逝、等正覺。所謂此有故彼有，此起故彼起，謂緣無明行，緣行識，乃至純大苦聚集，無明滅則行滅，乃至純大苦聚滅。

[0098b15] 「諸比丘！難得之處已得，生於聖處，諸根具足，乃至純大苦聚集，純大苦滅。

是故，比丘！當如是學，自利、利他、自他俱利。如是出家，不愚不癡，有果有樂，有樂果報，供養衣服、飲食、臥具、湯藥者，悉得大果、大福、大利。是故，比丘！當如是學。」

[0098b20] 佛說此經已，諸比丘聞佛所說，歡喜奉行。

(三五〇) # 觀察流轉

[0098b22] 如是我聞：

[0098b22] 一時，佛住王舍城迦蘭陀竹園。

[0098b23] 爾時，世尊告諸比丘：「多聞聖弟子不作是念：『何所有故此有？何所起故此起？何所無故此無？何所滅故此滅？』

然彼多聞聖弟子知所謂此有故彼有，此起故彼起，謂緣無明行，乃至純大苦聚集，無明滅故行滅，乃至純大苦聚滅。」

[0098b28] 佛說是經已，諸比丘聞佛所說，歡喜奉行。

(三五—) # 有滅

[0098c01] 如是我聞：

[0098c01] 一時，尊者那羅、尊者茂師羅、尊者殊勝、尊者阿難住舍衛國象耳池側。

[0098c03] 爾時，尊者那羅語尊者茂師羅言：「有異信、異欲、異聞、異行覺想、異見審諦忍，有如是正自覺知見生，所謂生故有老死，不離生有老死耶？」尊者茂師羅言：「有異信、異欲、異聞、異行覺想、異見審諦忍，有如是

正自覺知見生，所謂有生故有老死，不異生有老死。如是說有。」

[0098c09] 「尊者茂師羅！有異信，乃至異忍，得自覺知見生，所謂有滅、寂滅、涅槃耶？」

[0098c10] 尊者茂師羅答言：「有異信，乃至異忍，得自覺知見生，所謂有滅、寂滅、涅槃。」

[0098c12] 復問：「尊者茂師羅！有滅則寂滅、涅槃，說者汝今便是阿羅漢，諸漏盡耶？」

[0098c14] 尊者茂師羅默然不答，第二、第三問亦默然不答。

[0098c15] 爾時，尊者殊勝語尊者茂師羅：「汝今且止，我當為汝答尊者那羅。」

[0098c17] 尊者茂師羅言：「我今且止，汝為我答。」

[0098c17] 爾時，尊者殊勝語尊者那羅：「有異信，乃至異忍，得自覺知見生，所謂有滅，則寂滅、涅槃。」

[0098c19] 時，尊者那羅問尊者殊勝言：「有異信，乃至異忍，得自覺知見生，所謂有滅則寂滅、涅槃者，汝今便是漏盡阿羅漢耶？」

[0098c22] 尊者殊勝言：「我說有滅則寂滅、涅槃，而非漏盡阿羅漢也。」

[0098c23] 尊者那羅言：「所說不同，前後相違，如尊者所說，有滅則寂滅、涅槃，而復言非漏盡阿羅漢耶？」

[0098c25] 尊者殊勝語尊者那羅言：「今當說譬，夫智者以譬得解，如曠野路邊有井，無繩無罐，得取其水。時，有行人，熱渴所逼，繞井求覓，無繩無罐，諦觀井水，如實知見，而不觸身。如是，我說有滅則寂滅、涅槃，而自不得漏盡阿羅漢。」

[0099a02] 爾時，尊者阿難語尊者那羅言：「彼尊者殊勝所說，汝復云何？」

[0099a03] 尊者那羅語尊者阿難言：「尊者殊勝善說真實，知復何言。」

[0099a04] 時，彼正士各各說已，從座起去。

（三五二）# 若沙門婆羅門

[0099a06] 如是我聞：

[0099a06] 一時，佛住舍衛國祇樹給孤獨園。

[0099a07] 爾時，世尊告諸比丘：「若諸沙門、婆羅門於法不如實知，法集、法滅、法滅道跡不如實知，彼非沙門、沙門數，非婆羅門、婆羅門數，彼亦非沙

門義、婆羅門義，見法自知作證：『我生已盡，梵行已立，所作已作，自知不受後有。』

[0099a12] 「云何法不如實知？云何法集不如實知？云何法滅不如實知？云何法滅道跡不如實知？謂於老死法不如實知，老死集、老死滅、老死滅道跡不如實知。如是生、有、取、愛、受、觸、六入處不如實知，六入處集、六入處滅、六入處滅道跡不如實知。如是諸法不如實知，法集、法滅、法滅道跡不如實知。

[0099a19] 「若諸沙門、婆羅門於法如實知，法集、法滅、法滅道跡如實知，當知是沙門、婆羅門，沙門之沙門數、婆羅門之婆羅門數。彼以沙門義、婆羅門義，見法自知作證：『我生已盡，梵行已立，所作已作，自知不受後有。』

[0099a23] 「何等法如實知？何等法集、法滅、法滅道跡如實知？謂老死法如實知，老死集、老死滅、老死滅道跡如實知。如是生、有、取、愛、受、觸、六入處如實知，六入處集、六入處滅、六入處滅道跡如實知。如是諸法如實知，法集、法滅、法滅道跡如實知。」

[0099a29] 佛說是經已，諸比丘聞佛所說，歡喜奉行。

(三五三)

[0099b02] 如是我聞：

[0099b02] 一時，佛住舍衛國祇樹給孤獨園。

[0099b03] 爾時，世尊告諸比丘：「若沙門、婆羅門於法不如實知，法集、法滅、法滅道跡不如實知，當知是沙門、婆羅門，非沙門之沙門數，非婆羅門之婆羅門數，彼亦非沙門義、非婆羅門義，見法自知作證：『我生已盡，梵行已立，所作已作，自知不受後有。』

[0099b08] 「何等法不如實知？何等法集、法滅、法滅道跡不如實知？謂六入處法不如實知，六入處集、六入處滅、六入處滅道跡不如實知，而於觸如實知者，無有是處，觸集、觸滅、觸滅道跡如實知者，無有是處。如是受、愛、取、有、生、老、死如實知者，無有是處。

[0099b14] 「若沙門、婆羅門於六入處如實知，六入處集、六入處滅、六入處滅道跡如實知者，於觸如實知，斯有是處。如是受、愛、取、有、生、老、死如實知者，斯有是處。」

[0099b17] 佛說是經已，諸比丘聞佛所說，歡喜奉行。

(三五四)

[0099b19] 如是我聞：

[0099b19] 一時，佛住舍衛國祇樹給孤獨園。

[0099b20] 爾時，世尊告諸比丘……如上說。差別者：「若諸沙門、婆羅門於六入處不如實知，而欲超度觸者，無有是處，觸集、觸滅、觸滅道跡超度者，無有是處。

如是超度受、愛、取、有、生、老、死者，無有是處，超度老死集、老死滅、老死滅道跡者，無有是處。

若沙門、婆羅門於六入處如實知，六入處集、六入處滅、六入處滅道跡如實知，而超度觸者，斯有是處。如是超度受、愛、取、有、生、老、死者，斯有是處，乃至超度老死滅道跡者，斯有是處。」

[0099b29] 佛說是經已，諸比丘聞佛所說，歡喜奉行。

[0099c02] 如老死，乃至六入處三經。

[0099c03] 如是老死，乃至行三經，亦如是說。

(三五五) # 受智

[0099c04] 如是我聞：

[0099c04] 一時，佛住舍衛國祇樹給孤獨園。

[0099c05] 爾時，世尊告諸比丘：「當覺知老死，覺知老死集、老死滅、老死滅道跡。如是，乃至當覺知行、行集、行滅、行滅道跡。

[0099c07] 「云何當覺知老死？覺知緣生故有老死，如是老死覺知。云何老死集？生集是老死集，如是老死集覺知。云何老死滅覺知？謂生滅是老死滅，如是老死滅覺知。云何老死滅道跡覺知？謂八聖道是老死滅道跡，如是老死滅道跡覺知，乃至云何行覺知？謂三行，身行、口行、意行，如是行覺知。

云何行集覺知？謂無明集是行集，如是行集覺知。

云何行滅覺知？無明滅是行滅，如是行滅覺知。云何行滅道跡覺知？謂八聖道是行滅道跡，如是行滅道跡覺知。」

[0099c17] 佛說是經已，諸比丘聞佛所說，歡喜奉行。

(三五六)

[0099c19] 如是我聞：

[0099c19] 一時，佛住舍衛國祇樹給孤獨園。

[0099c20] 爾時，世尊告諸比丘：「有四十四種智。諦聽，善思，當為汝說。何等為四十四種智？謂老死智、老死集智、老死滅智、老死滅道跡智。如是生、有、取、愛、受、觸、六入處、名色、識、行智，行集智、行滅智、行滅道跡智，是名四十四種智。」

[0099c25] 佛說此經已，諸比丘聞佛所說，歡喜奉行。

（三五七）

[0099c27] 如是我聞：

[0099c27] 一時，佛住舍衛國祇樹給孤獨園。

[0099c28] 爾時，世尊告諸比丘：「有七十七種智。諦聽，善思，當為汝說。云何七十七種智，生緣老死智，非餘生緣老死智；過去生緣老死智，非餘過去生緣老死智；未來生緣老死智，非餘未來生緣老死智；及法住智，無常、有為、心所緣生、盡法、變易法、離欲法、滅法斷知智。

如是生、有、取、愛、受、觸、六入處、名色、識、行、無明緣行智，非餘無明緣行智；過去無明緣行智，非餘過去無明緣行智；未來無明緣行智，非餘未來無明緣行智；及法住智，無常、有為、心所緣生、盡法、變易法、無欲法、滅法斷智，是名七十七種智。」

[0100a10] 佛說此經已，諸比丘聞佛所說，歡喜奉行。

（三五八）# 流轉

[0100a12] 如是我聞：

[0100a12] 一時，佛住舍衛國祇樹給孤獨園。

[0100a13] 爾時，世尊告諸比丘：「有增法、減法。諦聽，善思，當為汝說。云何增法？所謂此有故彼有，此起故彼起，謂緣無明行，緣行識，乃至純大苦聚集，是名增法。云何減法？謂此無故彼無，此滅故彼滅，所謂無明滅則行滅，乃至純大苦聚滅，是名減法。」

[0100a18] 佛說此經已，諸比丘聞佛所說，歡喜奉行。

[0100a20] 如增法、減法。如是生法、變易法、集法、滅法如上說。

[0100a22] 如當說三經，有應當知三經如上說。

（三五九）# 來往

[0100a23] 如是我聞：

[0100a23] 一時，佛住舍衛國祇樹給孤獨園。

[0100a24] 爾時，世尊告諸比丘：「若思量、若妄想生，彼使攀緣識住；有攀緣識住故，有未來世生、老、病、死、憂、悲、惱、苦。如是純大苦聚集。」

若不思量、不妄想，無使無攀緣識住；無攀緣識住故，於未來世生、老、病、死、憂、悲、惱、苦滅，如是純大苦聚滅。」

[0100a29] 佛說此經已，諸比丘聞佛所說，歡喜奉行。

（三六〇）

[0100b02] 如是我聞：

[0100b02] 一時，佛住舍衛國祇樹給孤獨園。

[0100b03] 爾時，世尊告諸比丘：「若思量、若妄想者，則有使攀緣識住；有攀緣識住故，入於名色；入名色故，有未來世生、老、病、死、憂、悲、惱、苦。如是純大苦聚集。

若不思量、無妄想，無使無攀緣識住；無攀緣識住故，不入名色，不入名色故，生、老、病、死、憂、悲、惱、苦滅，如是純大苦聚滅。」

[0100b09] 佛說此經已，諸比丘聞佛所說，歡喜奉行。

（三六一）

[0100b11] 如是我聞：

[0100b11] 一時，佛住舍衛國祇樹給孤獨園。

[0100b12] 爾時，世尊告諸比丘：「若有思量、有妄想，則有使攀緣識住；有攀緣識住故，入於名色；入名色故，則有往來；有往來故，則有生死；有生死故，則有未來世生、老、病、死、憂、悲、惱、苦。如是純大苦聚集。

若不思量、無妄想，無使無攀緣識住；無攀緣識住故，不入名色；不入名色故，則無往來；無往來故，則無生死；無生死故，於未來世生、老、病、死、憂、悲、惱、苦滅，如是純大苦聚滅。」

[0100b20] 佛說此經已，諸比丘聞佛所說，歡喜奉行。

（三六二）# 佛順逆

[0100b22] 如是我聞：

[0100b22] 一時，佛住舍衛國祇樹給孤獨園。

[0100b23] 爾時，世尊告諸比丘：「有多聞比丘。云何如來施設多聞比丘？」

[0100b24] 諸比丘白佛：「世尊是法根、法眼、法依。唯願為說『多聞比丘』，諸比丘聞已，當受奉行。」

[0100b26] 佛告比丘：「諦聽，善思，當為汝說。諸比丘！若有比丘聞老、病、死，生厭、離欲、滅盡法，是名多聞比丘。」

如是生、有、取、愛、受、觸、六入處、名色、識、行，生厭、離欲、滅盡法，是名多聞比丘，是名如來所施設多聞比丘。」

[0100c02] 佛說此經已，諸比丘聞佛所說，歡喜奉行。

(三六三)

[0100c04] 如是我聞：

[0100c04] 一時，佛住舍衛國祇樹給孤獨園。

[0100c05] 爾時，世尊告諸比丘：「所謂說法比丘，云何說法比丘？云何如來施設說法比丘？」

[0100c07] 諸比丘白佛：「世尊是法根、法眼、法依。唯願為說『說法比丘』，諸比丘聞已，當受奉行。」

[0100c08] 佛告諸比丘：「若有比丘說老、病、死，生厭、離欲、滅盡法，是名說法比丘。

如是說生、有、取、愛、受、觸、六入處、名色、識、行，是生厭、離欲、滅盡法，是名說法比丘。諸比丘！是名如來施設說法比丘。」

[0100c13] 佛說此經已，諸比丘聞佛所說，歡喜奉行。

(三六四)

[0100c15] 如是我聞：

[0100c15] 一時，佛住舍衛國祇樹給孤獨園。

[0100c16] 爾時，世尊告諸比丘：「謂法次法向。諸比丘！云何名為法次法向？」

[0100c17] 諸比丘白佛：「世尊是法根、法眼、法依。善哉！世尊！唯願為說，諸比丘聞已，當受奉行。」

[0100c20] 佛告諸比丘：「若比丘於老、病、死，生厭、離欲、滅盡向，是名法次法向。

如是生，乃至行，生厭、離欲、滅盡向，是名法次法向。諸比丘！是名如來施設法次法向。」

[0100c23] 佛說此經已，諸比丘聞佛所說，歡喜奉行。

《雜阿含經卷第十四》

